

## **Radyo an Norvys**

(<http://www.dasunys.net/podcast.htm>)

**Titel:** Nowodhow an seythun (14/11/07)

**Auctour:** Matthew Clarke

**Dydh:** 14 Du 2007

**Pesyans:** 00:05:11

Mos a wren dhe'n sinema an seythun ma yn dyllans arbennik awos bos Goel Fylm Kernow synsys an bennseythun yw passyes. Chons o dhyn a weles askorrans henwys 'An Jowl yn agas Kegin' rag an kynsa prys. Gwaynyer o an kesstrif 'Govynn Kernewek' warlyna.

[CLIP]

An fylm o komedi settyes yn kegin a voesti gans keginer yn-dann wask a-y wreg. Gwrys veu gans Brett Harvey warlergh lies towlenn bellwolok kepar ha 'Devil's Kitchen'. Elizabeth Stewart a ros gweres dhodho yn unn dhyski leveryans an Kernewek...

[CLIP]

Dy 'Sadorn... ha Kernewegoryon a wrug kuntell dhe Bavyllyon an Pennsevik yn Aberfal. Ena y feu synsys keskows a-dro dhe wul fylmow y'n termyn a vynn dos.

Bert Biscoe a ledyas an keskows ha govynn orth an re esa ena a-dro dhe leshe fylmow ha gweles moy a virysi ragdha. Yth esa bardh Pol Hodge ena. Ev re weresas liesgweyth gans fylmow Kernewek...

[CLIP]

Y'n nowodhow arall... Dew dhen yw charjys gans moldrans a venyn yn Hellys. Y feu kevys korf Michelle Crossley, nawnsek-bloedh-warn-ugens hy oes, dy Sadorn yw passyes. Gweskys ha pychys o hi. An dus yw diw-vloedh-ha-dew-ugens hag unn-vloedh-warn-ugens... an dhew trigys yn Rysrudh. I eth a-dherag an lys lagha dy' Lun... kablys yns gans ladha an venyn.

\*\*\*

Ottomma an chi yn Kernow heb kudynn parkya. An chi yn Porthpyra yw dhe wertha rag tri milvil peuns. Rag an pris na... ni a gryssa y vos chi bras... byttegyns nyns eus marnas teyr chambour dhodho. An acheson rag an pris ughel... yma park kerri dhodho gans pypm ha hanter kans spas.

\*\*\*

Hag y'n rygbi an bennseythun yw passyes... An Vorladron a waynyas peswar poynt y'n gas erbynn Pow Evrog. An diwettha skorr o hwetek dhe dhewdhek.

An Para Oll-Du a gollas erbynn Nottingham tri-foynt-warn-ugens dhe unnek-warn-ugens.

Ha Rysrudh a fethas Halifax wosa vyaj hir... I a waynyas unn-poynt-ha-dew-ugens dhe seytek.

\*\*Ha henn yw oll erbynn nessa seythun pan glywyn a-dro dhe vagas dons Kernewek nowydh.